

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)

CM

Chief Minister Pu Lalduhoma'n Mizo kutthemthiamte kutchhuak chu state chhung mai ni lo ram pum huapa ngaihhlut a hlawh chhoh zel thu a sawi.

Vawiina Tribal Cooperative Marketing Development Federation of India (TRIFED) leh Cooperation department tangkawp buatsaih Zo Fair (Adi Bazaar) hawnna inkhawm a telpuinaah he thu hi Chief Minister chuan a sawi a. Chief Minister chuan Mizo kutthemthiamte kutchhuak hrang hrangte chu state pawn market lamah a thang hle tih sawiin kutthemthiamte thiamna chuan ram mipuite hriat a hlawh chho zel tih a sawi a. Mahni hman atan leh mahni inchhunga hman atana siam mai thin Mizo kutthemthiamte tan huang zauhna tur hun tha a rawn inher chho zel tih a sawi a ni.

Chief Minister chuan Tribal Cooperative Marketing Development Federation of India (TRIFED) leh Ministry of Tribal Affairs te hnathawh ropui a tih thu sawiin an hmalakna azarah tribal mipuite thleng phak anmahni dawmkanna tur sum tam tak pekchhuah a nih thin thu a sawi a. Kutthemthiamte tana hmasawna ruhrel dinna tur cheng vbc 6 chuang an tihchhuah thu a sawi.

Chief Minister chuan vawiina hmarchhak state hrang hrang atanga he Zo Fair-a dawr rawn hawng te chu mikhual an nih loh thu leh unaute an nih thu a sawi a. Ngaihngam taka mahni ina cheng anga Fair hman chhunga hun hmang thin turin a chah bawk a ni.

Zo Fair-ah hian dawr hrang hrang 25 hawn niin heng zingah eitur zawrhna dawr 2 a awm a. Mizoram pawn atangin dawr 15 an rawn hawng ve bawk a ni.



GORKHA YOUTH

Mizoram Gorkha Youth Association (MGYA) Central chuan vawiin khan Aizawl Vanapa Hall-ah Nepali thu leh hla thiam hmingthang, Adi Kavi Bhanu Bhakta Acharya piancham vawi 212-na (Bhanu Jayanti) an hmang.

He hunah hian zirtirtu pension leh social worker Pu Raju Shahi, MGYA Central-a hruaitu hlun tak ni bawk chuan a hmanpui a, MGYA hian kum 1992 atang khan he ni hi an lo hmang tan tawh a ni.

Adi Kavi Bhanu Bhakta Acharya hi Nepali literature 'Pa' tia koh a ni a. Ramayana chu Nepali tawng ngeia a lehlín avangin mi naran te'n thu leh hla leh sakhaw hriatna an lo neih phah a, Nepali tawng leh thu leh hla tihhmasawna kawngah hna ropui tak a thawk a ni.

He hunah hian MGYA chuan zirlai hlawhtling, High School, Higher Secondary, Graduation leh Post Graduation-a Distinction-a pass mi 67-te hnenah chawimawina an hlan bawk a ni.



SERCHHIP

Serchhip police te chuan vawiin khan ruihhlo cheng nuai 70 chuang hu an hal ral.

Vawiina ruihhlo an hal ral hi kum 2025 leh kum 2026 chhunga Serchhip Police ten ruihhlo chi hrang hrang an man, tih ral (dispose) theih tawhte a ni a. Serchhip District Drugs Disposal Committee Chairman, Pu Gavit Gogna hovin, he ruihhlo hal ralna hun hi hman a ni a, ruihhlo halral zawng zawng hi cheng nuai 70 sing 7 hu a ni a. Heroin gram 220 leh Crystal Methamphetamine gram 89 te hal ral a ni. Vawiina ruihhlo hal ral takte hi case hrang hrang 7 atanga mante an ni.



SC

Supreme Court chuan mi foreigner anih leh nih loh chian turin rorelna a lai hle tur a ni a ti.

Justice Vikram Nath leh Justice Sandeep Mehta te thutna bench chuan Assam state ah foreigner a chhal an nih avanga Supreme Court-a khingtu mi 27 te chungchang a ngaihtuahnaah court sang ber chuan fimkhur a tul thu a sawi a

State pakhatin mi foreigner anih leh nih loh tihchianna tur a hman dan te chu ngaih pawimawh tur anih rualin miin dan dik taka India khua leh tui anihna tichiang tura a dan zawhte chu zirchian hmasak a pawimawh a, pawng hnawl ngawt a thiang lo a ti.



REMAINS OF INDIAN TOURIST TO BE BROUGHT BACK

Vietnam Phu Quoc Island-a lawng pila thi India mi 15 te ruang chu vawiin hian Vietnam Airlines flight hmangin Ho Chi Minh City atangin rawn phurh thlen an ni dawn.

Vietnam-a Indian Embassy tarlan danin, an ruang hi vawiin tlai dar 6 ah Ho Chi Minh City atangin lo chhuahpuiin zan dar 9 leh 30 velah Mumbaia Chhatrapati Shivaji Maharaj International Airport rawn thlen a ni ang.

He chhiatna thleng chungchangah hian ram 2 te chuan theihtawp chhuahin vanduaina tawk chhungte tanpui turin hma an la a ni.

